

Il 7 d'avrel: Sogn Herman Giusep, confessur



Herman Giusep ei naschius el marcau da Kellen spel Rein. Ses geniturs fuvan da buna casa, da gronda pietad ed eran all'entschata rehs. Tras ina sventira a l'autra ein els daventai paupers munglus. Cheutras han els stuiu trer si quei affon en pupira cun pauper viver e sevestgir. Lur rihezia fuva igl affon Herman ch'era da pign ensi obedeivels, mudests, devozius e purtava ina speciala devoziun tier Nossadunna. El veva gronda premura da leger, scriver e studegiar.

Strusch 7 onns vegls e cura ch'ils auters affons termagliavan e fagevan lur spassatemp, mava el discusamein en baselgia da Nossadunna e steva leu ditg e plidava cun tutta fidonza e sinceradad baul cun Maria e baul cugl affon Jesus sin bratsch dalla mumma da Diu.

Beinduras purtava el flurs, meila u paun e metteva avon las statuas e rugava da retscheiver quei pauc sco schenghetg. Inaga porta el avon Nossadunna in meil e roga schi ditg e cun tala detschartadad da retscheiver quei pum ch'ella ha stendiu giu siu maun e retschiert il meil. Daleudenvi ha la Regina dil tschiel pliras ga tractau quei innocent Herman familiarmein, sco ina carina mumma tractescha in da ses affons. Inaga denton, cura ch'ils auters affons termagliavan, mava Herman en baselgia e veseva leu el chor Nossadunna, siu affon Jesus e sogn Gion Battesta. Ils dus affons sedivertevan ensemen e Nossadunna mirava tier.

Herman mira era in mument tier cun grond plascher. Vonzei di Maria, la mumma da Jesus ch'el dueigi era vegnir a dar cumpignia a Jesus ed a Gion Battesta. Herman rispunda ch'il chor seigi serraus cun in gatter ed el possi buca suren. Maria adhortescha puspei d'empruar e far siu pusseivel, ella vegni a gidar cun siu maun. Herman cuora tiel gatter, Maria porscha ad el il maun, gida el el chor e Herman ha la ventira da serecrear e guder la cumpignia da Jesus e da Gion Battesta entochen las uras da viaspras. Veramein ina grazia speciala! Tgei mumma savess carezar meglier siu affon?

Maria, Regina dils aunghels ha era els basegns temporals giu quita per siu survient cun proveder el cun las caussas necessarias en fuorma marvigliusa, sco ei suonda cheu. La pupira da siu bab lubeva buca da sevestgir e senutrir bein ed aunc bia meins da schar studegiar quei affon. Inaga igl unviern va Herman en baselgia senza calzers. Maria la mumma da Jesus damonda: Pertgei vas senza calzers en quei freid? Herman rispunda: Jeu hai negins calzers. Maria muossa ad el in cert crap, di dad ir tier quel ed el anfli leu suten ils daners per in pèr calzers. Herman obedescha ed anfla sut il crap en ils daners, muossa quels alla divina mumma che di ad el: Aschi savens che ti has da basegns da caultschas, calzers, pupi, cudischs ni enzatgei auter vegns ti adina ad anflar daners sut quei crap en. Dacheudenvi ha Herman buca stuiu pitir miseria per viver, sevestgir e studegiar.

Cun 12 onns ei il giuvenot ius en la claustra da Steinfeld e retschiert leu il habit dils paders Praemonstratens. Lu eis el vegnius tarmess a Friesland per studegiar. Suenter ver finiu ses studis cun particular laud ei Herman Giusep puspei vegnius clamaus da ses superiors en la claustra da Steinfeld. Leu ha el per in temps surviu el convent a ses confrars. Quei uffeci fageva el nuidis, perquei ch'el veva buca avunda peda per urar e meditar. Lu ei Nossadunna

cumparida e detg: Patratga o fegl che l'obedientscha ei ina dallas tias principalas obligaziuns. Ti sas far a mi ed a Jesus negin auter pli grond plascher che dad esser obedeivels. Tala admoniziun ha consolau il sogn pader ch'el ha daleudenvi surviu a ses confrars cun premura e plascher. Cu tuts vevan magliau survegneva el era sia spisa, mo pil pli restava ei per el mo paun ed aua.

Pli tard surpren el igl uffeci da sacristan. El stueva ver quita per il basegns ed il guvern dalla baselgia. Cheu saveva el suenter siu plascher urar, cantar, ludar Diu e sia sontgissima mumma. El durmeva pauc e quei mo sin in'aissa cun in crap ni tschep sut il tgau. El mortificava siu tgierp sin bia modas e scheva ch'il temps da questa veta dueigi buca vegnir impundius auter che cun endirar e far penetienzas. Tras semeglionts exercezis spirituals vegneva siu spért confortaus dil tschiel cun tala dultschezia ch'el carteva d'esser enta parvis.

Ei sa buca vegnir detg tut tgei grazias, favurs, benefecis e visetas familiaras ch'il sogn ha retschiert dalla Mumma da Diu ch'el carezava e honorava per sia mumma. El numnava mai il num Maria senza far ina reverenza. Cura ch'el mirava sin ina statua u sin in maletg da Nossadunna, vegneva el tschaffaus dil spért. Nossadunna ei savens cumparida ad el da di e da notg e discuriu, confortau e dumandau tgei che maunchi, tgei grazias e tgei basegns ch'el garegi.

Muort quella familiaritad che Nossadunna demussava enviers Herman vevan ils auters confrars entschiet a dar ad el il tiernum Giusep, spus da Maria purschala. Ord humilitonza leva Hermann buca vertir quei e scheva ch'el fussi gnanc vengonz da purtar il num Giusep. Ils paders calavan auncallura buca da clamar el fra Giusep. Herman veva ussa l'intenziun da selamentar per quei fatg avon ils superiurs.

Mo la notg avon fagend el oraziun en baselgia vesa el sper igl altar ina biala purschala vestgida sco ina princessa enamiez dus aunghels. In da quels di a l'auter: Cun tgi lein nus spusar quella purschala? L'auter rispunda: Cun quei fra cheu presents! Lura ha igl emprem aunghel fatg star si Herman e vegnir tier igl altar. Leu pren igl aunghel il maun dretg da Herman, metta quel ensem cul maun dretg dalla benedida purschala Maria e di: mira, questa purschala dun jeu a ti per spusa, sco ella ei stada spusa cun Giusep e perquei dueis ti da cheudenvi esser numnaus Giusep. Ella, la Regina dils aunghels sezza, clamava buca pli Herman, mobein Giusep cura ch'ella cumpareva. Ed era ella deva ad el sin bratsch siu divin affon Jesus, per purtar entuorn sco sogn Giusep veva savens fatg.

Cura che quei survient previgilau da Maria ha giu cumpleniu ils onns per vegnir ordinaus, ha el encunter sia veglia e sin camond dils superiurs, stuiu surprendre ils sogns uordens e retscheiver il prebisteriat. Alzaus ch'el fuva en quei ault stan sacerdotal, celebrava el mintgadi la sontga messa cun tala devoziun e cun sponder tontas larmas ch'el semegliava in Serafin tut envidaus dil fiug dalla carezia da Diu. Sia sontga messa cuzzava treis uras, biars dils spirituals meins devozius murmignavan ed ei fuva buca lev d'anflar in ministrant. La caschun da quels murmignems deva buca la plaunezia dalla messa, mobein il consum da candeilas.

Per saver conta tschera ch'il sogn drovi durant la celebraziun dalla sontga messa ha in fra priu quater tuttina grevas candeilas, tschentau quellas sin dus altars: duas sigl altar nua che sogn Giusep celebrava la messa solemna che cuzzava trei uras e las autras duas sin in auter

altar, nua ch'in spiritual fageva la messa sperta. Silsuenter ha il fra puspei pesau ellas e stuii constattar che las candelas nua che sogn Giusep veva celebrau, fuvan pli grevas che quellas dil sacerdot spert. Muort ils auters biars quittaus per la claustra ch'il sogn pader stueva haver, ha el entschiet a negligir las devoziuns, particularmein quellas da Nossadunna. Quella buntadeivla mumma ei lu cumparida ina notg ad el sco ina femna veglia e macorta. Il sogn empiara tut tementaus daco ch'ella seigi vegnida schi veglia e macorta? Maria rispunda: En tes egls sun jeu uss aschia, perquei che ti salidas mei buca pli schi savens ed era buca pli schi devoziusamein sco avon.

Sin quei avis ei sogn Giusep daventaus pli fervents che mai e Nossadunna ei era puspei cumparida biala e carina, dend vinavon a siu survient da tuttas sorts favurs e grazias. Denter quei ch'ei plascheivel da scriber ei quest: Sogn Herman veva pitgau ora dus dents. Il saung vegneva ord bucca ch'el saveva buca bein urar. Nossadunna cumpara, pren ils dents ch'el teneva enta maun, metta quels en bucca sco sch'els fussen mai stai dai ora. In di d'unviern zun freid, fuva el duront la celebrazion dalla sontga messa cul spért dil tuttafatg retratgs per ina grond'uriala: Jesus e Maria ein cumpari veseivlamein e scaldau ils mauns da sogn Herman cun lur divins mauns ch'el ha buca sentiu pli il freid.

Era sche sogn Hermann fuva favorisau dil tschiel cun totas honoreivlas honors, restava el auncallura humiliteivels e teneva sesez per in survient da negin valzen. El desiderava era da pitir cruschs e dolurs dil tgierp. El ei vegnius mudergiaus dolorusamein cun da tuttas sorts mals e malsognas, principalmein sin las vigelgias da grondas fiastas per ch'el hagi la caschun da sepreparar pli bein sil retscheiver las grazias divinas. La vigelgia da Nadal sesanflava el en in schi miserabel stan che tuts temevan ch'el mieri gest lu. Mo sin mesanotg eis el miraculusamein staus sauns, ha pudiu cantar mudinas culs auters e celebrar las treis sontgas messas senza enzenas da mal. El teneva gronda devoziun tier sontga Ursula e sias cumpognas martiras. Mo surtut teneva el adurau il sontgissim Sacrament digl altar. Quel visitava el savens cun tala humilitionza, mudestadad e devoziun che sia fatscha daventava tarlischonta sco quella d'in aungel. El aveva era gronda premura d'embellir la baselgia, ils altars, il tabernachel, sco era la statua da Nossadunna.

Encunter la fin da sia veta fageva il sogn biaras miraclas e profetisava che sia mort seigi damaneivel. Aunc pauc avon sia mort ha il demuni mulestau il sogn cun grevas tentaziuns e macortas figuras. Mo cun agid da Diu ha Giusep surventschii quei diabolic trafficar. En sia davosa cureisma ha el sin la damonda dallas muniessas Cisterziensas vuliu la lubientscha da siu prelat dad ir en lur claustra per far ils sogns exercezis. Vegnend el en quella claustra, ha Herman sco emprem signau cun siu fest ina fossa giu sil plaun schend: Cheu hai jeu da vegnir satraus. El porscha lu allas soras tut il desiderau agid spiritual e confiart.

Sin mardis sogn survegn el ina gronda febra, semetta en letg culs egls e cor alzai tier Diu e sia sontgissima Mumma. Tut ils dis ha el cuntinuadamein plidau cun Diu e cun la purschala Maria e sin la sera dalla gievgia da Pastgas ei quella innocenta olma sgulada tier il bab dalla misericordia per guder la veta perpetna ils 7 d'avrel 1233. Il sogn tgierp ei vegnius satraus leu nua ch'el veva giu mussau. Suenter siat jamnas eis el vegnus exhumau aunc tut frestgs e purtaus en sia claustra a Steinfeld, nua che Diu ha fatg bia miraclas per confirmar la sontgadad da sogn Herman Giusep.

Reflexiun

Esser gia da pign ensi veneratur da Nossadunna ei in segir mussament ch'in affon sesanfla sin buna via per contonscher ina beada mort. Cura ch'in affon entscheiva a tener car Nossadunna, ha el la caparra enta maun che la mumma da Diu vegni ad urbir ora pli e pli grazias e favurs da siu divin Fegl. Tgei favurs, grazias, benefecis e privilegis ha sogn Herman buca tut gudio e retschert cun esser da pign ensi staus devozius tier la mumma da Diu. La devoziun vera, sincera e statteivla tier la Regina dils aungheis mantegn il carstgaun en schubradad, humilitonza, pazienza e mortificaziun. Ventireivels pia quels affons che peglian en lur innocents onns la vera affecziun e devoziun tier la purissima Purschala. O tgei favurs han tals buca tut da spitgar, sch'els persevereschon d'esser vers survients da Maria? Villeg. Croiset.